

Gelixrdo Sul Vaexr Maele Ber

1

Zzasoso Dae Biex

¹ Ngo mel Barloxr a. Arbosobo xiar dae ddei dax zox dae a ngo Yisu Zidu miardal dae ca ddei bei a. Ngo nei niul nimar Tixrmoxrtaexl ngua nrrnel Gelixrdo zzi gga Arbosobo ddei jiaxlhuixl mel leil nei Yalgieyal mermi kebal Arbosobo ddei cassor-worssor maelmaerjjia leil xil vaexr gger. ² Niul ddei Arbbor Arbosobo nei niul ddei Seirpor Yisu Zidu leil nia leil cirza-hanga meixl gger lol nia, nixmox zzaso lol nia!

Arbosobo Ca Mel Leil Nixmox Dder Vaer Gger

³ Arbosobo leil mel bbeix zae gger nia. Yar mel niul ddei Seirpor Yisu Zidu Yarbbor ddei nga a. Yar lei niul ca mel leil zoxlnixr su Merhhexr Arbbor ddei nga a; niul leil nixmox dder vaer su ddei nga a. ⁴ Ngua cirza-hanga goxr sol pex dae car a, yar ngua leil nixmox dder vaer gger. Yel ngua lei cirza-hanga goxr sol pex dae su mel leil eil mel sael a nixmox dder vaer ssi cexr. ⁵ Ngua Zidu leil weix a hormo goxr sol a mel, Arbosobo dder Zidu bei dae mel leil ngol dae a ngua leil nixmox hormo dder vaer gger. ⁶ Ngua goxr sol a mel, nia leil nixmox dder vaer lol niazzir nei nia leil jiuxl wo lol niazzir a nga ar ddei a. Arseir ngua leil nixmox dder vaer gger arddeirnga a lei, hherdder nia leil nixmox dder vaer lol niazzir a nga ar ddei a. Nia leil nixmox dder vaer gger a mel, nia ngua goxr sol dae mel sael a hal mel pex dae a lei nia ssersei xie a. ⁷ Nia ngua dax ciryoxr a goxr sol a mel dder ngua dax ciryoxr a Arbosobo nia leil nixmox dder vaer gger var. Yel ngua ddarzzi, nia ssersei xie doxr dae var.

⁸ Arzzi-nimar arzzi-nimo mel ngua nia leil saexl lol nia, ngua Yalxilyal mermi hher dae car a mel, goxrsol-goxrnaxr hormo pex dae a, bei bbesur nr zza, ngua dir lei dir ssi nr xie, ngua gol dae var lei zzir nr bel.

⁹ Ngua nixmox zzar mel si lalnga a eine zzir dae. Nael eine nga a, ngua dder saexl, armael leil koxl nr cexr, ca mel si ho a yoxl gol du xixl lei lol su Arbosobo ddei leil koxl nia. ¹⁰ Halleix ngua si nrsulsul halcar yar ngua leil olga jiuxl, yar lei ngua leil jiuxl nia seir. Ngua halae arddolcar a yar ngua leil zeixleixr jiuxl loxia. ¹¹ Nia ngua leil beijiu a Arbosobo dax ddar biar gger a, Arbosobo ngua leil seirseir meixl gger var. Ca cirke a eil mel leil mia a dder yar leil nawo var.

Barloxr Yar Xiar Har Dae Ddei Gierbox

¹² Ngua nixmox zzar armael leil botaddu nr zza. Ngua bei dae mel ca mel dax hoxr, nia dax gielgiel hoxr. Arbosobo ngua leil ca nr fur lol, ngua leil seirseir mel lar xiar lol. Ngua ca xiar dae mel leil koxl dae nr nga a nei, Arbosobo ngua leil seirseir meixl gger dae mel leil koxl dae a bei. Eil ddei mel dder ngua kuarddu ddei nga a. ¹³⁻¹⁴ Ngua nia leil vaexr gger dae mel mel nia zza ho a dder saexl var. Nia mel ngua leil ardoxr saexl dae ho a; nael ngo nia leil ngua leil saexl gaxzi loxia. Eine nga a Seirpor Yisu jjixr lei car a, nia dder ngua leil kuar gger cexr, hherdder ngua nia leil kuar gger mel sael a nga.

¹⁵ Ngo mel nixmox zzar eine ddarzzi dae, yel halleix dder nia dax nr boxl lei niazzir. Eine nga a, nia leil hanol seir dax lol. ¹⁶ Ngo mel nia dax halmaex ssi gel a, Marcixrduixl mermi ssi. Yoxl Marcixrduixl mermi cirdae a, nia dax halmaex jjixr a, nia leil ngo leil ho lol a, Yoxrtaexl mermi ssi eine bei niazzir dae. ¹⁷ Nael giedae ngo nia dax jjixr lei nr zzae. Nia nael, ngo gguixleix-boxleixmo ar te a eine zzir dae meir. Holbbaexl ngo eine xiar a mel armael dax zox dae a xiar a ngo? Nia zzir dae a ngo sarmal zzael eine, sarmal zzael hane, bbeix dae a ngo?

¹⁸ Arbosobo mel yarzi koxlsseiddo, ngua lei yarzi koxlsseiddo. Ngua nia leil biar gger ddar mel, sarmal nael nga, sarmal nael nr nga, eine nr var.

¹⁹ Ngo nei Xila halae Tixrmoxrtaexl ngua nia leil biar gger dae Arbosobo ddei Ssor Yisu Zidu ddei mel sarmal nael nga, sarmal nael nr nga, eine nr var. Yar bbeix ci a mel dder bei ci. ²⁰ Arbosobo bbeix har zaxr goxr maelmaerjgia lei Zidu leil ngol dae a mel yarzi loxr a. Eine nga a niul “amae”^a bbeix. Niul eine bbeix a mel dder Arbosobo leil middux lol a.

²¹ Arbosobo mel niul leil beijjiu a Zidu leil velver a ddarzzi lol su ddei nga a. Yar mel yar ddei Xiu ddei niul leil gger a. ²² Niul yar ddei cassor-worssor bei a yar niul leil hoxltexr bei deix gger, hherdder yar ddei Xiu ddei niul nixmox zzar hher ji dae lol a. Yar niul leil yar ddei Xiu gger a mel niul leil saexl lol, yar bbeix har zaxr goxr mel arddolcar a arsaebeilei niul leil gger var.

²³ Ngo nia dax nr jjixr lei a mel nia leil bota nia-nr-zzir a nga arddeir a; Arbosobo lei saexl. ²⁴ Ngua nia leil guaxr gex dae a arsaee ddarzzi nia bbeix nr nga. Ngua nia leil beijjiu a nia miar bei carbeix bei a nia leil ggese lol arnar a. Nia Yisu leil velver a ddarzzi dae a mel yarzi barver var.

2

¹ Ngo xiar har ho a; ngo zeixleixr nia dax nr ssi, ngo nia leil cix lol nia-nr-zzir. ² Ngo nia leil cix lol arddeirnga a mel, arseir ngo leil ggese lol cexr bbeixleir? ³ Yel ngo dder nia dax nr ssi. Ngo hoba nia leil xil vaexr gger a, nia leil arsaee lerler bei nia hal mel bbeix gger ho a. Eine nga a mel ngo lei car ngo leil ggese lol mibbe ca hal mel dder ngo leil cix lol nr var. Ngo saexl, niul maelmaerjgia lei ggese var. ⁴ Ngo halleix nixmox zzar zza zzae zzasol, cix zzae cix, meixbbix hormo ddux a nia leil

^a1:20 *amae* Amae ddei yilsi mel dder nga a mar.

xil vaexr gger a mel, nia leil cix lol nr nga a nei, ngo nia leil arsaesael perniar, nia leil saexl lol arddeir a.

Arbosobo Zuixl Bei Su Mel Leil Vuxr-nr-yixr

⁵ Nia halmaex gga ca leil cix lol su ca hal ddei mel, ngo leil lar cix lol nr nga, nia maelmaerjgia leil cix lol. Ngo eine bbeix a mel bbeix lar nr hor. ⁶ Ca eil ddei leil mel jiaxlhuixl gga ca cirke a yar leil faxr ho a mel dder ddo a. ⁷ Nia yar leil zeixleixr vuxryixr nr ddo, yar leil nixmox dder vaer nia. Nr nga a yar cixmilsa a nixmox bbiex leilei. ⁸ Yel ngo nia leil quex, nia yar leil perniar dae seir yar leil saexl lol nia. ⁹ Ngo halleix nia leil xil vaexr gger a mel, nia cirza-hanga lei ngo ddei ddar nono bbe arleixr sixr i arddeir a. ¹⁰ Nia arseir leil ssoxrsuxl a mel ngo lei arseir leil ssoxrsuxl. Ngo arseir leil ssoxrsuxl arddeirnga a mel, ngo nia leil weix a Zidu ddei quexrlixl sser a yar leil ssoxrsuxl arddeir a. ¹¹ Ngo eine bei a mel, neir zzirmar Sardaxl te niul leil bei leixl nr gger lol.^b Yar azo nr seir bei niazzir dae mel niul lei saexl.

Yisu Miardal Dae Ca Mel Beilabox Miar

¹² Halleix ngo Taelloxryal zzi gga Zidu ddei ddar seirseir biar gger ssi car, Seirpor ngo leil beijjiu a ddar seirseir mel biar cexr lol. ¹³ Nael ngo mel nimar Tixrdo leil nr mia a ngo xiu ddei zzasol, yel ngo dder halmaex nr hher Marcixrduixl mermi ssi a.

¹⁴ Arbosobo mel arddolcar lei ngua leil hier dae a ngua leil Zidu dax hher ji dae lol a beix leixl lol. Yar ngua leil sser dae a Zidu ddei ddar

^b**2:11** *Ngo eine bei a mel, neir zzirmar Sardaxl te niul leil bei leixl nr gger lol. Sardaxl ca mel leil arsae bei leixl gger var neil? Jiaxlhuixl gga ca mel ca eil ddei leil ssoxr-nr-suxl arddeirnga a, ca eil ddei Yisu leil ddar-nr-zzi nga var piar a; bbeixsael jiaxlhuixl gga nr ssi bei var piar a. Halae jiaxlhuixl gga ca mel zzicarzzi dax toltor a nr bei lol bei var piar a.*

seirseir mel cirmaex-hanga ca leil biar gger ssi lol, hherdder yarzi ner xiu hal mel cirmaex-hanga xiu mal gger sael a nga. Yel ngua yar leil nawo. ¹⁵ Ngua Zidu ddei ddar seirseir mel, jiuxl wo ho ca mel leil bbeixsael Arbosobo dax bbe kae su ca mel leil biar gger car, Arbosobo zzir dae a Zidu ddei yarzi ner xiu hal mel yar dax ddeix ci sael a nga, yar leil ggese lol. ¹⁶ Jiuxl wo ho ca mel dax bbeix ci a nael, yarzi ner xiu eil mel dder yaa leil gol lol; Arbosobo dax bbe kae su mel dax bbeix ci a nael yarzi ner xiu eil mel yaa leil si lol. Arseir zabbar seirseir a Zidu ddei ddar mel ca mel leil biar gger bei ci xie neil? ¹⁷ Ca cirke a mel armael ddei seirggiebbæer xiar a, ca leil Arbosobo ddei ddar mel biar gger. Nael ngua mel yaa le-nr-sel, ca leil nr fur. Ngua leil mel Arbosobo miardal arddeir a. Ngua Zidu ddei quexrlxl leil koxl dae a Arbosobo meixsaer qier leil Arbosobo ddei ddar mel ca mel leil biar gger.

3

¹ Ngua armael ddei armael leil kuar dae a ngo? Holbbaexl ngua kebal ca mel sael a, ca leil qie a ngua arsaesael nga nia leil xil vaexr gger nia a ngo? Bbeixsael ngua nia leil qie a ngua arsaesael nga ca leil xil vaexr gger nia a ngo?^c ² Nia mel dder ngua arsaesael nga vaexr dae xil hal fo sael a nga.^d Nia mel ngua nixmox zzar vaexr ji dae sael a nga. Ngua nia dax arsaesael nga mel ca mel leil mia lol, saexl lol. ³ Nia mel dder Zidu vaexr dae xil fo nga a. Xil eil fo mel dder ngua nia leil arsaesael perniar

^c**3:1** Halleix ca mel xil ar fo vei dae a yaa arsae lerler nga ca mel leil saexl lol. Nael Gerlixrdo su ca mel Barloxr leil saexl ho a, yel yar zzir dae a yar mel xixl vei nr ssa.

^d**3:2** Arseir lei Gerlixrdo zzi gga Yisu leil ddarzzi su ca mel leil mia a dder Barloxr arsaesael nga saexl, yel yar xil vei dae a ca mel leil yar mel Yisu miardal dae ca a eine saexl lol nr ssa.

ca leil saexl lol. Zidu mel maexsuir sser a legelbbe leil vaexr deix dae nr nga, cirse-cirsil lei gol dae Arbosobo ddei Xiu ddei sser a ca mel nixmox zzar vaexr ji dae.

⁴ Ngua mel Zidu leil koxl dae a Arbosobo meixsaer qier leil einezeixl ddarzzi, yel ngua dder eine bbeix arddeir a. ⁵ Nael ngua eine bbeix a mel, ngua azo bei bbesur zza bbeix nr nga; bbesur eil ddei mel Arbosobo ngua leil gger a. ⁶ Yar mel ngua leil bbesur zza lol a yar bbeix har zaxr dae yarsixl ddei^e ca mel leil biar gger lol. Bbeix har zaxr dae yarsixl eil ddei mel Lixlfaxr leil vaexr dae ddar hal mel nr nga, Arbosobo ddei Xiu ddei bbeix dae arddeir a. Lixlfaxr ddei mel ca leil si lol, nael Arbosobo ddei Xiu ddei mel ca leil cirse-cirsil lei olga zza lol.^f

Arbosobo Bbeix Har Zaxr Dae Yarsixl Ddei

⁷ Legelbbe leil kaexl deix dae Lixlfaxr ddei mel ca leil si lol var bbeixarnar, Moxrxi Yirsaexllixl su ca mel leil Lixlfaxr biar gger car, Arbosobo ddei bbobbolbbo mel yar dax hher dax dae. Moxrxi qiaxrmeix ddei leil niar dae bbobbolbbo mel zzizzi a mier dae bbeixarnar, halae yarzi sael bbo, yel Yirsaexllixl su ca mel dder yar qiaxrmeix ddei leil malma i nr bel.^g ⁸ Halmel, Arbosobo ddei Xiu ddei bei dae hal mel gielgiel

^e**3:6** *yar bbeix har zaxr dae yarsixl ddei* Yisu si xilmeir leil dder Arbosobo ca mel dax bbeix har zaxr goxr a. Yar Yalda, Noxryal, Yalboxrlahar, Moxrxi, nei Daxlweixl yaa cirddeir-hanga dax lei bbeix har zaxr goxr a. Yisu si ho a Arbosobo zeixleixr ca mel dax bbeix har zaxr. Giedae yar ca mel dax bbeix har zaxr yarsixl ddei bir xilmeir yar ca mel dax bbeix har zaxr yarli ddei leil seir.

^f**3:6** Lixlfaxr ca mel leil arddolyox hoxr arddolyox nr hoxr mul gger bbeixarnar, ca leil olga jiuxl nr cexr.

^g**3:7** Cu'aezixr Sul 34:29-35 leil biar dae.

bbobbolbbo zza zzarmar? ⁹ Ca leil zuixl dixl gger dae Lixlfaxr ddei lei bbobbolbbo zza mel, ca leil zuixl nr zza lol Yisu ddei ddar seirseir mel gielgiel bbobbolbbo zza. ¹⁰ Eilleix ddei bbobbolbbo mel bir halleix ddei bbobbolbbo mel leil bbo leixl ho a; yel halleix ddei bbobbolbbo mel dder mia leil mia nr bbe.^h ¹¹ Zzizzi a mier hal mel lei bbobbolbbo zza mel, cirse-cirsil lei zza dae var hal mel gielgiel bbobbolbbo zza.

¹² Ngua mel eine nga loxia dae, yel ngua dder nixmox vaervaermo Yisu ddei ddar seirseir mel ca mel leil biar gger. ¹³ Moxrxi mel Yirsaexllixl su ca mel leil yar qiaxrmeix leil bbolbbo hal mel zzizzi a mier ggjie nr mia lol, yel qiaxrmeix leil mae ar co qiu gex dae. Nael niul mel Moxrxi le-nr-sel.ⁱ

¹⁴ Yirsaexllixl su mel nixmox gex, eilleix zzezze ci a lei yaa Lixlfaxr zza car a mel nixmox taex leil mae ar co qiu gex dae sael a nga, yel zza dil nr ddo. Yaa Zidu leil ddarzzi a saelnei mae eil co vei pixl cexr. ¹⁵ Halae eilleix ci a lei, yaa Moxrxi vaexr dae sul ber zza car mel, nixmox ddei leil mae ar co qiu gex dae sael a nga, zza dil nr ddo. ¹⁶ Nael yaa arddolcar Seirpor dax bei mae dae a mel, mae hal co dder arddolcar vei pixl.

¹⁷ Seirpor mel dder Arbosobo ddei Xiu ddei nga a. Arbosobo ddei Xiu ddei arddolmaex hher dae mel arddolmaex dder armael lozza. ¹⁸ Niul Yisu leil ddarzzi su mel qiaxrmeix leil mae co qiu nr gex dae, Seirpor ddei bbobbolbbo zza, yel ca mel leil mia lol. Seirpor hherdder Arbosobo ddei Xiu ddei niul leil ho bei ho yar sael a loxr lol a, gielgiel bbobbolbbo

^h**3:10** Eilleix ddei bbobbolbbo mel dder Yisu ddei ddar seirseir mel leil bbeix. Halleix ddei bbobbolbbo mel dder Lixlfaxr leil bbeix. Yilsil mel dder bbeix, Lixlfaxr ddei leil lei i du a mel, Yisu ddei ddar seirseir mel leil gielgiel i du nia.

ⁱ**3:13** Moxrxi biar dae Lixlfaxr mel yar qiaxrmeix leil niar dae bbolbbo mel sael nga, zzizzi a mier var. Nael Barloxr biar dae ddar seirseir mel cirse-cirsil lei bbo, cirse-cirsil lei zza dae.

bbo dax lol.

4

Yarzi Naxrcixl Zzaegu Mel Nilhar Cu Teixl Lei Ddei Gga Ji

¹ Yel Arbosobo mel ngua leil zoxlnixr a, ngua leil yar ddei ddar mel ca leil biar gger lol, ngua dder nixmox nr bbiex. ² Ngua mel sixil-wormeir ddux bei nr ddo hal mel nr bei, cafur-calel hal mel nr bei, Arbosobo ddei ddarzi mel nr hoxr biar mal nr gger. Doxgoxleixr ddarzi mel lar biar, yel ca mel leil nixmox zzar ngua arsaesael nga saexl lol. Ngua saexl, Arbosobo ngua leil i dae. ³ Ngua biar dae ddar seirseir mel noni wo sol arddeirnga zzorbbeixlei, cirse-cirsil Arbosobo dax bbe kae su ca hal mel lar noni wo nr xie.^j ⁴ Ddar-nr-zzi su ca hal mel mel, middurbbor ddei neir zzirmar te yaa leil Arbosobo ddei ddarzi mel leil noni wo nr xie lol, yaa leil bbelele ddei leil mia nr xie lol, hherdder yaa leil yarzi middux Zidu ddei ddar seirseir mel leil nr saexl lol. Zidu mel dder Arbosobo ddei yoxryaxl ddei nga a. ⁵ Ngua mel armael leil nr biar, Yisu Zidu mel Seirpor a eine lar biar; halae Yisu leil weix a ngua nia leil visser su loxr a eine biar. ⁶ Bbelele ddei leil miardal a neixmarggie zoxl teixl lei lol su ddei mel Arbosobo a. Yar mel bbelele ddei ngua nixmox zzar zoxl ji dae lol ho a. Yar eine bei a mel ca mel leil saexl lol, Zidu leil mia a mel dder yar ddei bbobbolbbo mel leil mia a.

⁷ Arbosobo yar ddei Xiu ddei niul nixmox zzar hher ji dae lol a mel, yarzi naxrcixl zzaegu mel nilhar cu teixl lei ddei gga ji sael a nga. Yar eine bei a mel ca mel leil saexl lol, ca mel ddoddomo bei bbesur zza a

^j**4:3** Cirse-cirsil Arbosobo dax bbe kae su mel hherdder Yisu leil ddar-nr-zzi su, Arbosobo ddei Xiu ddei yaa nixmox zzar hher nr ji dae ca mel nga a, yel yaa dixlyuxl gga ssi nia.

mel, armael zza nr nga, Arbosobo gger arddeir a. ⁸ Ngua cirmaex-hanga nr seir pex dae mel lei, ngua leil bei leixl nr gger, ngua nixmox zzar arsae bei nia lei nr saexl bbeixarnar, nael ngua nixmox nr bbiex; ⁹ si ngua leil bixr bbeixarnar, nael Arbosobo ngua leil piar pixl nr gger; si ngua leil deil guirle gger a lei, ngua leil bei zil nr gger. ¹⁰⁻¹¹ Ngua gol dae seir bbeixarnar, ngua saexl ngua Yisu leil ddarzzi a si ngua leil bei zil gger var. Ngua arddolcar a lei Yisu leil weix a goxr sol a olga lei pixl nrsulsul a mel, ca mel leil Yisu ddei olga ddei ngua ggecir gga hher ji dae a ngua leil hhel du lei lol saexl lol. ¹² Eine bbeix zei lei a mel, ngua olga lei pixl nrsulsul eine goxr sol a mel, nia leil cirse-cirsil si nr var olga hal ddei li wo lol a.

¹³ Arbosobo Ddei Sul ber leil vaexr dae a bbeix: “Ngo ddarzzi a ngo dder biar,”^k eine bbeix a. Ngua mel ddar eil qier bbeix su ca eil ddei dax ciryoxr a ddarzzi, yel ngua lei ca leil ddar seirseir biar gger ssi. ¹⁴ Ngua saexl, Seirpor Yisu leil gol du xixl lei lol su Arbosobo ddei mel ngua leil Yisu sael a gol du xixl lei lol var, yar halae niul leil yar xilmeir ngier dae lol. ¹⁵ Eil mel maelmaerjia lei nia leil seirggiebbær weix a nga arddeir a. Eine nga a mel, Arbosobo seirseir meixl gger dae ca mel ho bei ho miur dax, Arbosobo leil nawo su mel lei ho bei ho miur dax, yel dder yar leil middux lol. ¹⁶ Hherdder eine nga a ngua nixmox bbiex nr var. Ngua ddei ggecir ddei ho bei ho mar zei lei a bbeixarnar, nael nixmox zzar mel cir ni bixr cir ni leil hhel du lei a. ¹⁷ Ngua eilleix pex dae cirza-hanga goxr sol eil mel mel cirleixr a nga, bbeix lei bbeix nr bbe, nael arddolcar a ngua li wo ddo yarzi naxrcixl yarzi middux hal mel mel eilleix pex dae mel dax bir nr cexr. Hal mel mel cirse-cirsil lei zza doxr dae. ¹⁸ Ngua mel eilleix mia ddo dae eil mel leil nr i, mia nr ddo hal mel leil lar i. Eilleix mia ddo dae eil mel mel cirleixr a nga, nael mia nr ddo hal mel mel

^k4:13 Sipi Sul 116:10 leil vaexr dae.

cirse-cirsil lei zza doxr dae var.

5

Ggecir Yarsixl

¹ Niul saexl, niul middurbbor ddei xigex ddei caexr pixl gger a mel, niul dder Arbosobo niul leil bei har gger dae merlabbor xi ddei gga hher wo ddo. Eil ddei mel ca zi teixl lei nr nga, Arbosobo zi teixl lei a. Cirse-cirsil lei zza dae var.¹ ² Niul middurbbor ddei xigex hherdder middurbbor ddei ggecir ddei mel worgge a, niul yarzi sael merlabbor ddei xi hherdder merlabbor ddei ggecir ar ddei zza loxia, hherdder pia sixl lael sael a lael gex. ³ Arbosobo niul leil merlabbor ggecir gger a mel, niul ddei xiu ddei leil ggecir gga hher ji dae lol. ⁴ Niul middurbbor ggecir ddei mel sul zzae sulku, cix zzae cix. Niul mel middurbbor ggecir ddei li nia-nr-zzir nr nga, merlabbor ggecir ddei hanol li niazzir arddeir a. Yel middurbbor si var ggecir ddei merlabbor ggecir ddei loxr a mel, si nr var a. ⁵ Niul leil eil mel bei gger su ddei mel dder Arbosobo ddei nga a. Yar mel yar ddei Xiu ddei niul leil gger a niul saexl, arddolcar a yar niul leil ggecir yarsixl ar ddei gger nia.

⁶ Yel ngua middurbbor ggecir ddei gol dae seir mel, ngua dder Seirpor dax cirgo a hher nr cexr ngua saexl bbeixarnar, nael ngua halae nr gexr. ⁷ Ngua ca mu a mel ngua mia mel leil koxl dae nr nga, Seirpor leil ddarzzi a yar leil koxl dae arddeir a. ⁸ Ngua mel gexr nr saexl, ngua dder ggecir ddei leil nr li lei ddo, Seirpor dax cirgo a hher yuex. ⁹⁻¹⁰ Niul ca cirddeir-hanga lei Zidu ca leil serpaxl ggie halmaex ngier dae a, ca mel armael bei goxr mel dax zox dae a yar ca cirddeir-hanga leil ser nia.

¹5:1 Middurbbor xigex ddei mel niul middurbbor ddei ggecir ddei leil bbeix. Merlabbor xi ddei mel niul merlabbor ggecir ddei leil bbeix.

Seirseir bei su mel leil nael seir lol, nr seir bei su mel leil nael faxr. Yel ngua xiar har ho a; ngua middurbbor hher dae bbeixsael merlabbor hher dae lei Seirpor leil ggeese lol nia.

Arbosobo Ca Leil Yar Dax Seir Xixl Lol

¹¹ Ngua saexl, Seirpor leil mel gexr nia, yel ngua dder ca leil Arbosobo ddei ddar no nia quex. Ngua arsaesael nga Arbosobo saexl, ngo lei nia leil nixmox zzar ngua leil saexl loxia. ¹² Ngua mel nia dax armael leil kuar gger nr nga, nia leil ngua leil kuar gger lol niazzir a nga arddeir a. Eine nga a mel, nia dder mia ddo mel leil lar kuar^m nixmox taex leil nr kuar su ca mel leil ddarkoxl ddu zza a. ¹³ Ngua tae arddeirnga a mel, Arbosobo leil weix a nga arddeir a. Ngua nr tae arddeirnga a nael, nia leil weix a nga arddeir a.ⁿ ¹⁴ Zidu ngua leil perniar a, ngua leil eine nga lol. Ngua saexl, yar ca maelmaerjjia leil weix a si a mel, zuixl bei meixr su ca li maelmaerjjia lei si ho a. ¹⁵ Yar ca maelmaerjjia leil weix a si a gol du xixl lei a mel, gol dae seir ca hal mel leil armael leil weix a gol dae nr nga a nei, yar leil weix a gol dae lol.

¹⁶ Yel eine zzezze mel ngua dder kebal ca mel sael a ca nr i. Halleix ngua yaa sael a Zidu leil i goxr a bbeixarnar, nael eilboxl ngua yar leil eine nr i a. ¹⁷ Arseir Zidu leil ddarzzi a yar dax hher ji dae a mel dder ca sixl loxr a. Ca mu a halleix sael a nr mu, nixixl goxr a Zidu dax bei mae dae. ¹⁸ Eil mel maelmaerjjia lei Arbosobo xiar dae mel dax zox dae arddeir a; yar Zidu leil si lol a niul leil yar dax seir xixl lol, halae niul leil

^m**5:12** *mia ddo mel leil lar kuar* Mia ddo mel mel cirza-hanga zzaegu zza mel leil lar kuar nr nga, halae Yoxrtaexl su cirza-hanga leiddur mel dax bei mae dae mel leil lei kuar.

ⁿ**5:13** Barloxr mel yixrmeix ka, meixcir mia, halae merlabbor ddeix a. Yel yar eil mel ca leil biar gger a, ca cirmelmel a zzir dae a yar tae a.

ca leil quex lol a yar dax seir xixl lol. ¹⁹ Arbosobo Zidu leil sser dae a middurbbor ca mel leil yar dax seir xixl lol. Yaa armael ddei zuixl mel yaa oldde leil nr ddeix lol. Halae ca leil yar dax seir xixl lol var ddar mel niul leil jia gger a ca mel leil biar gger ssi lol. ²⁰ Yel ngua Yisu Zidu miardal dae ca bei a, Arbosobo ngua leil sser dae a nia leil quex mel sael a nga. Ngua Zidu leil weix a nia leil qiuxr, nia Arbosobo dax seir xixl hor! ²¹ Arbosobo mel zuixl nr zza su hal ddei leil niul leil weix a zuixl zza su loxr lol, yel niul lei yar leil koxl dae a Arbosobo niul leil zuixl nr zza i mal gger.

6

¹⁻² Arbosobo bbeix:

“Ngo dixl har dae nixixl ddei ci a, ngo ni leil ddarkoxl a;
ca leil jiuxl nixixl ddei ci a, ngo ni leil beijjiu a,”^o

eine bbeix a.

Nia i ddo a, eilcar mel dder Arbosobo dixl har dae nixixl ddei ci a; eilcar mel dder Arbosobo ca leil jiuxl nixixl cir ni ci a. Yel ngua Arbosobo dax miar bei carbeix mel nia leil quex, Arbosobo nia leil seirseir meixl gger, nia leil ssoxrsuxl, eil mel nia li wo ho a, nia eil mel leil i zeir ddo.

³ Ngua mel azo ca leil lei zuixl nr bei ssi lol, nr nga a, yaa ngua miar bei dae mel leil nrbba nrbba biar leilei. ⁴ Ngua azo bei lei ca mel leil ngua mel Arbosobo leil visser su a saexl lol niazzir: hherdder bbeix goxrsol-goxrnaxr mel pex dae, yarzi sol, cirza-hanga nr seir mel pex dae a lei ngua sser gex dae. ⁵ Si ngua leil deil, ngua leil ge du lei, ca cirke a ngua leil yarzi gexrddo dir; ngua yarzi sulku, yixrmeixl lei jjiu nr ddo, zzo

^o6:1-2 Yirsaexlyal Sul 49:8 leil vaexr dae.

meixr doxr. ⁶ Ngua nixmox seir, xiar saexl, ssertexr zza, ca leil zoxlnixr, Arbosobo ddei Xiu ddei ngua nixmox zzar hher ji dae, ca leil perniar laexl nr nga a nei yarzi perniar, ⁷ ddarzi mel biar, Arbosobo leil koxl dae a ddoddomo bei, hoxrhoxr mel bei ssi a nr seir mel leil dir,^p yel ca mel leil ngua mel Arbosobo leil visser su a saexl lol. ⁸ Ngua leil i du su lei zza, i zei su lei zza; ngua leil hie no su lei zza, kuar gger su lei zza. Ngua ca furllesu a bbeix su lei zza, nael nga zzael ngua ddarzi mel a biar dae, ⁹ arseir lei ngua leil saexl, nael ca mel ngua leil i nr du, ngua olga lei pixl nrsulsul goxr sol dae, nael nr si. Ca ngua leil faxr, nael bei zil nr gger, ¹⁰ cix lei cix dae, nael Yisu ngua leil perniar a ggeseddu lei miur, sol lei sol, nael ca cirke leil be lol, middurbbor mel cirza lei nr zza, nael merlabbor mel cirza hanga lei zza. Arsae nga zzorbbeixlei, ca mel leil ngua mel Arbosobo leil visser su a saexl lol niazzir. ¹¹ Gelixrdo zzi gga ca mel, ngua mel nixmox taex lei nia leil giexl teixl gger lei nrsulsul zza dae, ngua nia dax ddarzi mel a biar. ¹² Ngua nia leil perniar, nael nia ngua leil per-nr-niar. ¹³ Ngo nia dax ddar biar a mel armael anix dax biar mel sael a biar dae, yel nia lei ngua leil perniar nia.

¹⁴ Nia ddar-nr-zzi su ca mel dax cirgo a lorleix bil nr ddo, hherdder yaa dax cir piar a bei nr ddo. Nixmox seir su ca mel nei nixmox neix su ca mel arsae cir piar a bei cexr bbeixleir? Bbelele nei neixmarmar mel arsae cirgo a zza dae cexr bbeixleir?^q ¹⁵ Zidu nei neir zzirmar^s te mel zzi dax arsae bei hoxr ddo bbeixleir? Seirpor leil ddarzzi su nei ddar-nr-zzi su

^p**6:7** *hoxrhoxr mel bei ssi a nr seir mel leil dir* Xilaxl ddar bbeix:

“hoxrhoxr mel bei niazzir a, leixrhher gga zzi deil labox vei dae.”

^q**6:14** *Bbelele nei neixmarmar mel arsae cirgo a zza dae cexr bbeixleir?*

Tisarloxrnixrjia Sul Vaexr Beil Ber 5:4-5 leil biar dae.

^s**6:15** *neir zzirmar* Xilaxl ddar bbeix “Beliyar.” Neir zzirmar te mel “Beliyar” ae.

mel nixmox ciryoxt a nr nga. ¹⁶ Arbosobo leil zi ggje xi zzir nei bbex mel arsae cirgo a zza dae cexr bbeixleir? Eine nga a niul Arbosobo leil ddarzzi su mel ddar-nr-zzi su mel dax cir piar a bei nr ddo. Niul mel hherdder cirse-cirsil lei gol dae Arbosobo leil zi ggje xi zzir nga a. ^t Hherdder Arbosobo bbeix goxr mel sael a nga, yar bbeix:

“Ngo ngo ddei cassor-worssor mel dax cirgo a hher nia,
yaa dax ssissi-leilei ssi nia.
Ngo yaa ddei Arbosobo bei nia,
yaa ngo ddei cassor-worssor bei nia.”^u

¹⁷ Seirpor yoxl bbeix:

“Nia yaa^v dax halmaex ddux lei nia,
yaa dax bbe kae nia,
sei-nr-beix hal mel dax naer nr ddo,^w
eine nga a mel ngo dder nia leil li.^x

¹⁸ ‘Ngo nia ddei arbbor bei nia,

^t**6:16** *Niul mel hherdder cirse-cirsil lei gol dae Arbosobo leil zi ggje xi zzir nga a Halleix Arbosobo yar leil zi ggje xi gga hher dae, eilleix yar ddei xiu ddei yar leil ddarzzi su ca mel nixmox zzar hher ji dae.*

^u**6:16** Lixlweixljil Sul 26:12 nei Yilixlmir Sul 32:38 nei Yirsijiexr Sul 37:27 leil vaexr dae.

^v**6:17** *yaa* Yaa mel dder Arbosobo leil ddar-nr-zzi su.

^w**6:17** *sei-nr-beix hal mel dax naer nr ddo* Sei-nr-beix hal mel hherdder Arbosobo bbeix goxr a zzor nr ddo, ta nr ddo, sser nr ddo hal mel nga a.

^x**6:17** Yirsaexlyal Sul 52:11 nei Yirsijiexr Sul 20:34 nei 20:41 leil vaexr dae.

nia ngo ddei ssormine bei nia,' ”

eine bbeix a.

Ddar eil mel mel ddo zzir Seirpor ddei bbeix a.^y

7

¹ Ngo perniar dae ca mel, Arbosobo mel niul dax eine bbeix har zaxr goxr ho a; yel niul armael leil zuixl bei ssi lol nr ddo. Ggecir ddei leil nei xiu ddei leil naex lol var zuixl mel piar pixl gger nia. Nixixl goxr a Arbosobo leil gexr a armael leil seirceix-seirmaer loxr lol nia.

² Nia ngua leil perniar nia. Ngua arseir dax yixrsixr nr zza hal mel bei nr goxr, arseir leil ke nr goxr, arseir dax azo lerler li mi-nr-bbe mel li nr goxr. ³ Ngo eine bbeix a mel nia leil zuixl dixl gger nr nga. Ngo halleix dder bbeix goxr a; ngua arddolcar lei nia leil nixmox zzar ji dae, nia dax cirgo a gol bbeixsael si zzorbbeixlei ngua bei yuex. ⁴ Ngo nia leil yarzi sael ddarzzi, arddolcar lei nia leil kuar gger dae, nia ngo leil nixmox dder vaer a, ngua cirza-hanga nr seir hal mel pex dae car lei yarzi sael ggese.

⁵ Ngua Marcixrduixl mermi ssi ci halcar a cirdoxr lei hher so nr sar, zzarvul-zzarmae lei nr seir mel pex dae, ca dax zzae ca dax bei sol, nixmox zzar zzae nixmox zzar gexr. ⁶ Nael Arbosobo mel nixmox bbiex su mel leil nixmox dder vaer su ddei nga a. Yar Tixrdo leil lei lol a ngua leil nixmox dder vaer a. ⁷ Tixrdo jjixr lei a ngua yarzi ggese, nia yar leil nixmox dder vaer a, ngua leil lei nixmox dder vaer. Yar mel nia ngo leil arsae sael jjiur dae, nia halleix bei cox mel leil weix a arsaesael cix dae, nia ngo leil arsaesael perniar dae, maelmaerjjia ngo leil biar gger a, ngo leil yarzi ggese lol.

^y**6:18** Sarmur'aer Sul Vaexr Maele Ber 7:14 nei 7:8 leil vaexr dae.

⁸ Halleix ngo nia leil xil vaexr gger a nia leil cix lol a ngo arleixr waxlhuixr goxr a bbeixarnar, nael ngo saexl, nia cix a mel cirleixr a nga, yel eilboxl ngo waxl-nr-huixr a. ⁹ Eilcar ngo yarzi ggese, nael nia cix a ngo ggese nr nga a nei, nia cix halae huixrsoxr saexl a nga arddeir a. Nia Arbosobo xiar dae ddei dax zox dae a cix a mel nia nixmox ddei dder gierbox a, yel ngua bei dae mel dder nia leil nr ke. ¹⁰ Ca mel Arbosobo xiar dae ddei dax zox dae a armael ddei zuixl mel leil weix a cix a mel, nixmox zzar dder huixrsoxr var. Eine nga a mel yaa leil dder jiuxl wo ddo, yel zuixl mel leil weix a cix a lei waxlhuixr nr var. Nael Arbosobo leil nr saexl su mel cix dae bbeixarnar yaa huixrsoxr nr saexl, yel yaa xiu ddei gol du xixl lei nr var. ¹¹ Nia i ddo a. Nia Arbosobo xiar dae ddei dax zox dae a cix a mel nia Arbosobo ddei miar bei ggese, ca mel leil nia bei nr cox saexl lol, bbaehhexhhex a nr bei hal mel leil einezeixl sirzzi, (nr seir hal mel leil) nixmox zzar einezeixl gexr, ngo leil yarzi mia loxia, hoxrhoxr mel bei meixr, bei nr hoxr su ca hal mel leil yarzi larhor faxr loxia. Nia zabbar seilseir a bei dae eil mel leil i a dder nia leil botaddu nr zza saexl ddo. ¹² Ngo nia leil xil vaexr gger a mel zuixl bei su mel leil weix a vaexr nr nga, si yar leil nr seir bei goxr ca mel leil weix a vaexr nr nga. Ngo xil vaexr a mel nia hoxrcixlcixlmo ngua leil beijjiu a Arbosobo mia dae nia leil saexl lol. ¹³ Hherdder eine nga a ngua leil nixmox dder vaer a.

Ngua leil lar nixmox dder vaer nr nga a nei, halae nia Tixrdo leil beijjiu a yar leil nixmox^z zzar zzaso lol a, yel ngua lei yarzi ggese. ¹⁴ Ngo Tixrdo dax nia leil kuar gger dae mel mel yarzi a; hherdder ngo nia dax ddarzi biar dae hal mel sael a nga; yel ngo yar dax nia leil azo lerler kuar gger goxr zzorbbeixlei ngo seixl-nr-da. ¹⁵ Yar mel, ha nia arsae yar ddar no, halae yar leil i du a seilseir a yar leil hexl eil mel leil holcir du lei a

^z7:13 *nixmox* Xilaxl ddar bbeix “xiu.”

gielgiel nia leil yarzi sael jjiur. ¹⁶ Ngo nixmox zzar mel nia leil yarzi sael ddarzzi dae, yel eilcar ngo yarzi ggese.

8

Hoxrcixlcixlmo Azo Lerler Gger

¹ Arzzi-nimar arzzi-nimo mel, Arbosobo Marcixrduixl mermi jiaxlhuixl mel leil arsae seirseir meixl gger ngua nia leil bbeix gger nia. ² Yaa cirza-hanga goxrsol-goxrnaxr mel pex dae a hal mel yaa leil yarzi larhor six i dae bbeixarnar, yaa halae yarzi sael ggese; yaa sol zildu bbeixarnar, nael halae hoxrcixlcixlmo ca leil beijjiu a yaa leil zzirbae gger. ³ Eil mel mel ngo mia dae, yaa ca leil zzirbae gger a mel yaa bei ci xie mel lar bei nr nga a nei, bir hal ddei leil lei miur leixl a. Yaa ddei yaa ⁴ zoxlzoxl a ngua leil qiuxr a, yaa leil Arbosobo ddei cassor-worssor mel^a leil zzirbae gger lol. ⁵ Yaa bei dae mel mel ngua xiar dae mel leil lei miur leixl. Yaa Arbosobo xiar dae ddei dax zox dae a hoba armael leil Arbosobo leil gger a saelnei ngua leil beijjiu. ⁶ Halleix Tixrdo nia Gerlixrdo su ca mel leil quex a zzirbae gger lol, yel ngua yar leil quex a, yar nia dax halmaex seirseir bei beil eil jji bei jjia lol. ⁷ Nia mel Yisu leil yarzi sael ddarzzi, Arbosobo ddei ddar seirseir mel yarzi biar var, Arbosobo Ddei Sul ber lei yarzi saexl, ca leil lei yarzi beijjiu ggese, halae ngua leil lei yarzi perniar, cirza-hanga eil mel lei yarzi bei seir, yel nia seirseir eil jji bei car lei hoxrcixlcixlmo bei nia.

⁸ Ngo eine bbeix a mel nia leil miardal nr nga, nia ca leil arsae perniar, kebal jiaxlhuixl gga ca mel ca leil arsae perniar arleixr bir arnar, yel nia yarzi ca leil perniar nga nga bbe arleixr sixr i. ⁹ Niul ddei Seirpor Yisu

^a8:4 *Arbosobo ddei cassor-worssor mel* Arbosobo ddei cassor-worssor eil mel mel Yiluxlsaler zzi gga hher dae.

Zidu ca leil seirseir meixl gger dae hal mel nia saexl ho a: yar mel cirza-hanga lei zza arddeir a; nael nia leil weix a azo lei nr zza loxr a. Yar eine bei a mel, yar sol a, nia leil be lol a azo lei zza lol niazzir a nga arddeir a.

¹⁰⁻¹¹ Nia mel arni lilcoxll zzirbae gger beil su mel nga a. Eil ddei mel nia nixmox zzar xiar dae a bei du lei beil arddeir a. Ngo zzir dae a nia miar eil ddei bei jjia nia. Eine nga a mel nia leil seir. Nia halleix nixmox zzar yarzi bei ggese mel, nia dder eilleix bbesur ddei dax zox dae a bei jjia nia.

¹² Ca mel nixmox zzar gger ggese arddeirnga a mel, Arbosobo lei yaa dax li ggese. Arseir hormo gger bbesur zza a mel, hormo gger.

¹³⁻¹⁴ Ngo eine bbeix a mel, nia leil miar lir bei lol, kebal ca leil miar la bei lol nr nga, bbaehhexhhex a nga nia. Nia eilcar a cirza-hanga lei zza a mel, nia dder nr zza su mel leil beijjiu nia. Arddolcar a yaa cirza-hanga lei zza a mel, nia sserddu nr zza a yaa dder nia leil beijjiu. Eine mel dder bbaehhex a. ¹⁵ Hherdder Arbosobo Ddei Sul ber leil vaexr dae mel sael a nga, bbeix: “Miur se wo su mel lei sser nirzzei nr zza, niul se wo su mel lei sser loxr nr ddo nr zza,”^b eine bbeix a.

Tixrdo Leil Gelixrdo Mermi Ssi Lol

¹⁶ Ngo Arbosobo leil nawo a. Yar Tixrdo leil ngua sael a nia leil yarzi perniar lol. ¹⁷ Yar eine nga a mel ngua yar leil quex lar nr nga a nei, yar armael lei bei ggese a nga arddeir a. Yar yarzi sael nia dax halmaex ssi niazzir. ¹⁸ Ngua lei kebal nimar ar ddei leil miardal a yar dax cirgo a ssi lol; nimar eil ddei Yisu leil biar dae ddar seirseir mel ca leil biar gger car, eilmaex jiaxlhuixl cirddeir-hanga lei yar leil yarzi i du. ¹⁹ Eine lar nr nga, halae jiaxlhuixl gga ca mel yar leil tiur a ngua dax cirgo a zzirbae eil mel Yiluxlsaler zzi gga ho mal gger lol, yel Seirpor leil middux lol, halae ca

^b8:15 Cu'aezixr Sul 16:18 leil vaexr dae.

mel leil ngua lei yarzi bei ggese saexl lol. ²⁰ Yel ngua dder cirgo a ssi a. Nr nga a mel ngua zzirbae einezeixl ar ke guaxr dae a si ngua leil nrbba nrbba bbeix leilei. ²¹ Ngua zabbar seirseir arla seirseir eil mel bei a mel Seirpor meixsaer qier leil lar bei nr nga, ca mel meixsaer qier leil lei bei. ²² Yel ngua yoxl zeixleixr kebal nimar ar ddei leil miardal a yaa dax cirgo a ssi lol. Yar zoxlzoxl a zabbar seirseir a miar bei a, yar Arbosobo ddei miar bei a yarzi ggese ngua leil saexl lol. Yar nia hoxrcixlcixlmo zzirbae gger var yarzi sael ddarzzi, yel eilleix yar gielgiel bei ggese. ²³ Tixrdo leil bbeix ci a nael, yar ngo ddei carbeix a; yar ngo dax cirgo a nia leil beijjiu. Yar dax cirter a ssi nimar mel leil bbeix ci a nael, jiaxlhuixl gga ca mel yaa leil miardal si lei arddeir a. Yaa mel Zidu leil middux lol a. ²⁴ Nia yaa leil perniar nia. Eine nga a mel, kebal jiaxlhuixl mel gga ca mel dder saexl, ngua nia leil baexr a kuar gger dae nr nga.

9

¹⁻² Nia nixmox zzar ca leil yarzi beijjiu ggese mel ngo saexl. Ngo dder Marcixrduixl mermi su ca mel dax nia leil kuar gger a bbeix, nia Yalgieyal mermi Gelixrdo zzi gga su ca mel arni lilcox l cirdae a dder ca leil lei zzirbae gger yuex. Nia nixmox zzar einezeixl seir a Marcixrduixl mermi su ca cirke leil lei zzirbae gger yuex lol. Yel Arbosobo ddei cassor-worssor^c mel leil beijjiu eil ddei leil bbeix ci a mel, ngo nia leil xil vaexr gger loci nr ssa. ³ Nael ngo nimar hal nrnel sael leil hoba lei lol a mel, nia leil ngo bbeix dae ddar mel dax zox dae a zzirbae geso har zaxr dae lol. Nr nga a ngo nia leil kuar gger dae ddar mel baexr a kuar gger a. ⁴ Algaxl Marcixrduixl mermi su ca mel ngo dax cirgo a lei arddeirnga a,

^c9:1-2 *Arbosobo ddei cassor-worssor* Eilmaex gga bbeix dae Arbosobo ddei cassor-worssor mel dder Yiluxlsaler zzi gga Arbosobo leil ddarzzi su mel nga a.

nia leil zzirbae geso nr har dae mia a mel, ngua nia leil einezeixl ddarzzi lei nia ngua leil yaa dax seixlda lol, nia armael gielgiel yaa dax seixlda a. ⁵Yel ngo zzir dae a ngo dder nimar hal nnel sael leil quex a ngo xilmeir leil lei zaxr lol nia, yel yaa leil nia ca leil zzirbae gger nia ddarkoxl goxr mel bei har zaxr lei lol. Eine nga a mel nia nr gger goxr nr ddo a gger dae nr nga a nei, ggegge-sese a gger dae a.

Hoxrcixlcixlmo Ca Leil Azo Lerler Gger

⁶Nia holcir dae nia: “Lalal a dae su mel lalal lar se wo ddo, miurmiur dae su mel miurmiur se wo ddo.” ⁷Arbosobo mel nixmox zzar ggegge-sese arla yar leil gger su mel leil lizoxr, yel nia cirddeir-hanga lei nixmox zzar hormo gger ggesse mel dder hormo gger. Nixmox zzar bei sol nr ssa, ddoddo-nrddo gger lol nr ssa. ⁸Arbosobo cirza-hanga seirseir mel nia leil daxlgaxl-daxllixl meixl gger var, arddolcar lei nia leil cirza-hanga lei sserddu zza lol, halae ciryoxr-hanga seirseir cirke bei cexr lol. ⁹Ggegge-sese arla hoxrcixlcixlmo gger su ca mel Arbosobo yaa leil seir lol, hherdder Arbosobo Ddei Sul ber leil vaexr dae mel sael a nga bbeix:

“Yar hoxrcixlcixlmo casolssor leil azo lerler gger a;
yar seirseir bei dae mel cirse-cirsil lei zza dae nia,”^d

eine bbeix a.

¹⁰Arbosobo mel silmo xiu su mel leil silmo meixl gger su, ca leil loxlmoxr meil zol su ddei nga a, yar nia leil cirza-hanga daxlgaxl-daxllixl meixl gger var, yoxl nia leil seirseir hal mel cirke bei ssi lol, hherdder saer zzei mel saer naxrcixl niar teixl lei sael a nga. ¹¹Arbosobo

^d9:9 Sipi Sul 112:9 leil vaexr dae.

arsaebeilei nia leil cirza-hanga lei zzeilixl-zzeilor zza lol, yel ca leil daxlgaxl-daxllixl meixl gger ddu zza lol. Nia gger dae mel ngua ca mel leil ho mal gger a yaa dder Arbosobo leil nawo var.

¹² Niul eine bei a ca leil beijjiu a, Arbosobo ddei cassor-worssor mel leil yaa sser zoxr mel gger, halae ca seirseil ar ke lei Arbosobo leil nawo lol.

¹³ Nia mel Zidu leil ssexl, yar ddei ddar seirseir mel dax bei mae dae halae hoxrcixlcixlmo Yiluxlsaler zzi gga ca mel leil nei kebal ca mel leil zzirbae gger. Nia seirseir bei dae eil mel leil arseir lei saexl a, ca mel Arbosobo leil middux lol.

¹⁴ Yaa lei Arbosobo nia leil cirza-hanga seirseir meixl gger dae eil mel leil mia a nia leil mia loxia, nia leil Arbosobo dax ddar biar gger.

¹⁵ Arbosobo ca leil cirza-hanga seirseir meixl gger dae eil mel biar lei biar jjia nr ddo a, yel ngo Arbosobo leil nawo!

10

Barloxr Armael Ddei Quexrlixl Ddei Leil Kuar

¹ Ngo mel Zidu sael a nga nr col, ddar te a lei norlixlix a te, ngo nia leil quex. Nia ca cirmelmel a zzir dae a ngo nia dax hher dae car zzael nixmox ye, nia leil xil vaexr gger car zzael nixmox vaer. ² Nia ca cirmelmel a zzir dae a ngo mel Yisu leil ddar-nr-zzi su mel sael a miar bei. Nael ngo nia leil qiuxr, ngo bbeix dae mel sael a bei nia, yel ngo nia dax hher dae car, nixmox vaervaermo yaa leil bota loci nr ssa. ³ Ngua mel middurbbor nixixl goxr dae bbeixarnar, ngua zaxlddaexr a mel Yisu leil ddar-nr-zzi su mel dax zox dae a ddaexr nr nga. ⁴ Ngua zaxlddaexr a sserlabox hal mel lei ca mel ngua leil gger nr nga, Arbosobo ngua leil gger arddeir a. Arbosobo mel ngua leil ddoddomo bei bbesur zza lol. Eine nga a mel ca mel cirza-hanga nr seir xiar ji dae mel leil lei bei leixl gger ddo. ⁵ Yoxl ca leil bbiur gex dae a Arbosobo leil nr saexl lol,

hherdder nixmox zzar yarzi col xiar dae hal mel leil bei leixl gger. Halae ngua nixmox taex leil Zidu dax ciryoxr a xiar lol. ⁶ Ngua bei har zaxr dae ho a; nia Yisu dax bei mae gaxzi halcar ci a mel, ngua dder Yisu dax bei nr mae su hal mel leil faxr lei du a.

⁷ Nia mel azo i lei mia ddo ggie lar i. Arseir Zidu dax bei mae su a yar eine zzir dae arddeirnga a, yar cexrssexl nia, ngua lei ciryoxr a Zidu dax bei mae dae su. ⁸ Seirpor ngua leil quexrlixl eil ddei gger a mel nia leil ke lol nr nga, nia leil hhel du lei lol arddeir a. Yel ngo quexrlixl eil ddei leil kuar gger a, ardoxr kuar miur zzorbbeixlei ngo seixl-nr-da. ⁹ Ngo nia leil xil vaexr gger a mel nia leil zux lalnga, nia eine zzir nr ddo. ¹⁰ Ca cirmelmel a bbeix: “Barloxr xil vaexr a hexr zxae hexr, hhel zxae hhel, nael niul dax lei a zrael nixmox ye, ddar lei biar nr var a cir ddei a,” eine bbeix. ¹¹ Ddar eil mel bbeix su ca mel saexl nia, ngo nia dax nr hher dae car xil vaexr a arsae bbeix goxr a mel, ngo nia dax lei car lei dder arsae bei nia.

¹² Nael ngua mel yarzi col ca hal mel dax bir nr bel. Yaa armael ddei armael kuar, armael ddei armael bir. Yaa mel yarzi medeil; ¹³ ngua mel armael leil kuar zzorbbeixlei kuar miur nr var. Arbosobo ngua leil bei lol miar mel leil lar kuar, hherdder ngua nia dax bei dae miar mel nei kebal jiaxlhuixl gga bei dae miar mel nga a. ¹⁴ Ngua Yisu Zidu ddei ddar seirseir mel nia leil biar gger beil a; yel ngua nia dax halmaex miar bei dae mel mel Arbosobo ngua leil bei lol mel leil miur nr leixl. ¹⁵ Kebal ca mel miar bei dae hal mel nael ngua nr kuar. Ngua mel nia ho bei ho Yisu leil ddarzzi dax loxia, yel ngua nia dax halmaex miar bei dae mel lei ho bei ho miur du dax lei lol. ¹⁶ Eine nga a mel, ngua dder Yisu Zidu ddei ddar seirseir mel kebal mermi ca leil lei biar gger cexr a; hherdder si biar gger su nr zza hal mel leil biar gger, yel ngua dder kebal ca mel bei dae mel leil kuar nr nga a. ¹⁷⁻¹⁸ Yarzi kuar ggerlabox mel mel armael ddei

armael kuar dae hal mel nr nga, Seirpor yar leil kuar gger dae mel a. Yel hherdder Arbosobo Ddei Sul ber leil bbeix dae mel sael a nga, bbeix: “Arseir kuar arddeirnga a mel dder Seirpor bei dae hal mel leil kuar nia,”^e eine bbeix a.

11

Barloxr Leil Nei Xiezi Yarjiar Leil Biar

¹ Ngo ca medeil sael a armael leil kuar gger dae zzorbbeixlei, nia leil qie nia ngo leil arleixr sser gger dae la. ² Ngo mel nia leil perniar a nia leil sirzzi var hherdder Arbosobo nia leil perniar a nia leil sirzzi var mel sael a nga. Ngo nia leil capor ar ddei zo gger har dae ho a. Yar mel dder Zidu a. Yel nia mel zeixleixr lei capor dax naer nr goxr seir cirmusixl sael a yar ddei maerssor bei nia.^f ³ Yel ngo kebal ca mel nia leil fur lei a gexr hherdder sae te Xiaxlwaxr leil fur sael a nga.⁹ Eine nga a mel, nia nixmox cirtaex-lorbba Zidu dax mae dae nr nga, yar leil lar visser nr nga.

⁴ Ca mel nia leil azo biar gger lei, nia hazzi noni ggese. Hherdder yaa nia leil ngua biar dae Yisu ddei nr nga, kebal Yisu ar ddei biar gger; bbeixsael ngua biar dae Xiu ddei nr nga, kebal xiu ar ddei biar gger; bbeixsael yoxl ngua nia leil biar gger dae ddar seirseir mel nr nga, kebal ddar ar yoxr biar gger arddeirnga zzorbbeixlei, nia hazzi noni ggese.

^e10:17-18 Yilixlmir Sul 9:24 leil vaexr dae.

^f11:2 *Yel nia mel zeixleixr lei capor dax naer nr goxr seir cirmusixl sael a yar ddei maerssor bei nia.* Yilsil mel dder “ngo nia leil Yisu arseir a biar gger a, yel nia zabbar seirseir a Yisu leil ddarzzi a yar dax mae dae, cirse-cirsil yar dax cirgo hher dae cexr.”

⁹11:3 Cuaxlsixljil Sul 3 leil biar dae.

⁵ Nia leil eine mulggersu ca eil mel yaa zzir dae a yaa yarzi sexr. Nael ngo zzir dae a ngo yaa zzi nr zza cirdoxr lei nr zza mar. ⁶ Ngo ddar biar nr var bbeixarnar, Arbosobo Ddei Sul ber mel ngo saexl dae. Nia ngo cirza-hanga bei dae mel leil i a dder saexl ddo a.

⁷ Ngo nia dax azo lei nr li Arbosobo ddei ddar seirseir mel nia leil biar gger. Ngo eine bei a mel armael leil i nr du nr nga a nei, ca mel nia leil i du lol. Holbbaexl ngo eine bei a lei bei cox a ngo? ⁸ Ngo kebal su ddei jiaxlhuixl gga zzirbae sser a nia leil visser. Ngo eine bei a mel yaa dax su si lei a nia leil visser dae mel sael a nga.

⁹ Ngo sser zoxr cirza-hanga lei Marcixrduixl mermi lei arzzi-nimar mel ngo leil vei gger si lei a, yel ngo nia dax cirgo a hher dae car, ngo azo lerler sser zoxr zza bbeixarnar a, ngo nia dax azo lei li nr goxr, halleix tortor lei nia dax li nr goxr, arddolcar ci a lei li nr var. ¹⁰ Ngo yarzi bbeix Zidu ddei ddarzi mel ngo nixmox zzar ji dae sael a nga, ngo armael leil kuar dae eil mel Yalgieyal mermi su ca mel ngo leil nr kuar lol bei nr cexr.^h ¹¹ Ngo arsaenga a eine bbeix neil? Holbbaexl ngo nia leil per-nr-niar a ngo? Nr nga mar! Ngo nia leil perniar mel Arbosobo saexl. ¹² Ngo halae ngo eilcar bei dae mel sael a bei zei si nia seir, yel yaa bei dae mel ngua dax ciryoxr a nga eine kuar su ca hal mel leil kuar ddu nr zza lol. ¹³ Nael ca eil mel mel Yisu miardal dae ca yarzi mel nr nga. Yaa Yisu miardal dae ca bei laexl dae a kebal ca leil fur ssi. ¹⁴ Yarzi bbeix eine nga a lei murgur nr ssa. Sardaxl te lei tisir yarzi seir hal mel bei laexl dae var. ¹⁵ Yel Sardaxl leil visser su mel nixmox seir gaxzi su hal

^h**11:10** Yalgieyal mermi jiaxlhuixl mel Barloxr leil zzirbae gger a yar leil beijjiu nr goxr, yel Barloxr eine kuar a lei yaa ddar bbeixddu nr zza. Gelixrdo zzi ddei mel Yalgieyal mermi gga hher ji dae a, yel Yalgieyal mermi su ca mel leil bbeix a mel Gelixrdo su ca mel leil lei bbeix dax dae a.

mel sael a bei laexl dae a lei murgur ddu nr zza. Nael yaa yarzi gexrddo eine bei a mel, arddolcar a yaa bei dae mel dax zox dae a, Arbosobo yaa leil faxr nia.

Barloxr Arsae Lerler Goxr Sol

¹⁶ Ngo nia dax zeixleixr ar boxl bbeix: nia arseir lei ngo leil ca medeil ar ddei i mal gger nr ddo. Nael nia ngo leil ca medeil i mal gger arddeirnga a, nia dder i mal gger ddo. Eine nga a ngo armael leil arleixr kuar gger cexr. ¹⁷ Ngo eilcar armael leil kuar dae eil mel mel Seirpor ngo leil kuar lol nr nga, ca medeil sael a nrbba nrbba kuar dae lalnga. ¹⁸ Nael si lei armael leil kuarddo a mel, ngo lei armael leil kuar nia. ¹⁹ Nia einezeixl jilixr lei, nia halae ca medeil mel dax ssertexr zza bbe! ²⁰ Si nia leil ggux ci, nia dax azo lerler su, nia leil ggux zi, nia leil i zeinei nia bborji leil deil a lei nia halae hazzi ssertexr zza bbe! ²¹ Nael ngo yarzi qiaxrmeix zzi nr zza, ngo yaa sael a eine bei ci nr xie!

Ngo yoxl ca medeil sael a arleixr biar seir, si lei kuar bel mel mel ngo lei kuar bel. ²² Yaa Xiboxrlaexr su ca a ngo? Ngo lei nga a mar! Yaa Yirsaexllixl su ca a ngo? Ngo lei nga a mar! Yaa Yalboxrlahar giedae ca a ngo? Ngo lei nga a mar! ²³ Yaa Yisu leil visser su ca a ngo? Ngo arleixr kuar seir, ngo gielgiel nga a. Ngo mel yaa leil hormo sulku leixl, ngo leil loxrgier ggie lei hormo boxl nei geji a; si ngo leil hormo boxl nei deil, si nrsulsul lei zae nr boxl sael nga a. Ngo yaa leil hormo goxr sol leixl.

²⁴ Yoxrtaexl su ca mel lorddu sser a ngo leil ngor boxl deil, arddol boxl lei soceige zax deil; ²⁵ so boxl a nael zzargger sser a deil, cir boxl a nael legelbbe sser a zaxr. Ngo cuaxr cux dae a cuaxr jiaxl neixvi teixlleil xiaxr a lei so boxl pex dae a; cir boxl a giel ngo neixvi teixlleil cir xixl cir ni bu za doxr a. ²⁶ Ngo cirmaex-hanga ssi doxr, lazzarmo leil gger a lei fa sol, zzaexpor pex dae a lei fa sol, ngo ngua Yoxrtaexl su ca mel dax cirgo a hher dae a lei fa sol, Yoxrtaexl su nr nga ca mel dax cirgo a hher dae a

lei fa sol, zzi gga hher dae, mipaerbbae gga hher dae, bbeixsael neixvi teixlleil ssi dae a lei fa sol. Halae Yisu leil ddarzzi su yarjjar mel dax cirgo a hher dae a lei fa sol. ²⁷ Ngo arddolcar lei yarzi sulku, yixrmeixl lei jjiu nr ddo, meixr zzae meixr, sixl zzae sixl, zzorddu nr zza, pia lemelmel a veixrddu lei nr zza, zzix lei zzix wo nr ddo. ²⁸ Eil mel lar nr suax, ngo halae nixmox zzar jiaxlhuixl mel gga ddei cirza-hanga lei zoxrzixr doxr nia. ²⁹ Arseir azo lerler bei ci nr xie zza a, ngo lei bei ci nr xie zza. Arseir ca leil zuixl bei ssi lol a, ngo sir-nr-zzi arddollei bbeixleir?

³⁰ Nael ngo armael lei kuar nr gger goxr nr ddo arddeirnga a, ngo dder ngo azo lerler bei ci nr xie zza hal mel leil lar kuar. ³¹ Niul ddei Seirpor Yisu Zidu Yarbbor mel Arbosobo ddei nga a. Yar leil mel cirse-cirsil lei bbeix zae gger nia. Ngo ca nr fur mel yar saexl. ³² Halleix ngo Daxlmarsixlgexr zzi gga hher dae car, Yallurdargur mi zzirmar ddei yar woxrke vaervaerpor mel leil miardal a zzi gga alddur mel leil su dae lol a, ngo leil ssu niazzir. ³³ Yel ngo dder beller ar taex gga cux ji dae a, ca mel dder beller taex leil baezo ar zex neixl gex a, ngo leil weixrqiaxr cuahopeixl ddei gga weixrqiaxr mael leil diux zei gger a. Eine saelnei ngo pato wo.

12

Barloxr Meixcir Mia Nei Ggecir Ddei Leil Alcur Ar Baex Ngox Dae

¹ Eine kuar doxr a mel arseir dax lei seirggiebbae nr zza, ngo saexl, nael ngo halae nr kuar goxr nr ddo. Arbosobo ca leil meixcirⁱ mia lol mel

ⁱ12:1 Meixcir mel cirmelmel a Arbosobo ca leil mia lol, cirmelmel a neir ca leil mia lol. Arbosobo mia lol hal mel mel yarzi a halae ca leil beijjiu. Neir mia lol hal mel mel ca leil fur, ca lei ke lalnga.

nei ca nr saexl mel ngo nia leil biar gger nia.^j ² Ngo Zidu dax mae dae su ca ar ddei saexl,^k ceili koxl xilmeir leil Arbosobo yar leil merlabbor so cexr ddei gga ddeix ci lol a.^l Nael yar xiu ddei lar ddeix bbeixsael ggecir ddei jiujiu ddeix a mel ngo nr saexl, Arbosobo lar saexl. ³ Ca eil ddei, yar xiu ddei lar ddeix bbeixsael ggecir ddei jiujiu ddeix a mel ngo nr saexl, Arbosobo lar saexl. ⁴ Yar mel seir gaxzi ggie halmaex ddeix ci a,^m yel yar halmaex gga yarzi murgur arseir lei biar teixl lei nr xie ar mel bbejjiur a. Eil mel mel ca leil biar gger nr ddo. ⁵ Ca eil ddei mia mel leil weix a ngo arleixr kuar nia, nael armael leil weix a mel, ngo armael bei ci nr xie hal mel leil lar kuar. ⁶ Hherdder bbeix ngo kuar arddeirnga a lei, ddarzi mel leil lar kuar, yel ngo kuar a lei hoxr. Ngo mel ca mel ngo leil yarzi sexr ar ddei i mal gger lei a gexr a, ngo dder ngo mia wo nei bbejjiur wo leil nr kuar.

⁷ Arbosobo ngo leil cirza-hanga cirke mia lol, cirke saexl lol, yar ngo leil nr col lol a, ngo leil alcur ar baex ngox dae lol, hherdder Sardaxl te miardal si lei hal ddei leil ngo leil zoxlzer doxr lol. Eine nga a mel ngo dder col nr var a. ⁸ Ngo, Seirpor Arbosobo leil ngo leil alcur eil baex giexl pixl gger la so boxl qiuxr goxr a. ⁹ Nael Seirpor bbeix: “Ngo ni leil seirseir

^j**12:1** Gelixrdo su ca cirmelmel a Barloxr leil i nr du a, yaa zzir dae a Barloxr Yisu miardal dae ca nr nga, yel Barloxr dder Arbosobo yar leil mia lol murgurgurmo hal mel yaa leil biar gger.

^k**12:2** *Ngo Zidu dax mae dae su ca ar ddei saexl* Ca eil ddei mel dder Barloxr nga a. Yar armael leil nr bbeix a mel yar nr col a nga arddeir a.

^l**12:2** *merlabbor so cexr ddei gga ddeix ci lol a* Arbosobo mel merlabbor so cexr ddei gga hher dae.

^m**12:4** *Yar mel seir gaxzi ggie halmaex ddeix ci a* Eilcar a seir gaxzi ggie mel merlabbor nga a. Arbosobo leil ddarzzi su ca mel si ho a seir gaxzi ggie hher dae.

meixl gger dae mel ni cirza-hanga lei sser loxr ddo a; ca mel azo lerler bei ci nr xie hal mel zza a mel, yaa dder ngo ddoddomo bei ggie mia ddo a,” eine bbeix. Yel ngo dder ngo azo lerler bei ci nr xie zza hal mel leil hanol kuar meixr. Eine nga a mel Zidu dder ddoddomo bei a ngo leil beijjiu cexr a. ¹⁰ Ngo arddolcar azo lerler bei ci nr xie zza a mel Seirpor dder arddolcar ngo leil hhel du lei lol, yel Zidu leil weix a, si ngo leil ci, ngo leil bbeix vuxryixr, ngo leil goxr sol lol, ngo leil ke, ngo leil sulku lol bbeixsael ngo azo lerler bei ci nr xie zza zzorbbeixlei ngo ggese.

Barloxr Gelixrdo Jiaxlhuixl Gga Ca Mel Leil Perniar

¹¹ Ngo yoxl ca medeil sael a armael leil kuar gger dae a; nael nia ddoddo-nrddo ngo leil kuar lol arddeir a. Ngo azo lei nr suax zzorbbeixlei, nael yaa ddei yaa zzir dae a Yisu miardal dae ca yarzi sexr hal mel, ngo yaa zzi nr zza nr nga mar. Yel nia ngo leil kuar gger mibbe arddeir a. ¹² Ngo nia dax cirgo a hher dae car a yarzi ssertexr zza, halae Arbosobo lar bei var yarzi ddo yarzi murgur hal mel cirke bei a, nia leil ngo mel dder Yisu miardal dae ca ddei nga a saexl lol. ¹³ Nael kebal jiaxlhuixl dax le-nr-sel mel ciryoxr a zza, hherdder ngo nia leil maxr-nr-faxr. Eil dox leil bbeix ci a nael, ngo bei nr hoxr, yel nia ngo leil tor sir-nr-zzi! ¹⁴ Ngo yoxl so boxl ddei nia dax lei niazir dae a. Nael ngo nia dax zzirbae li niazir nr nga a nei, nia ca ddei leil li niazir, yel eilboxl lei ngo nia leil maxrfaxr nr var. Yarzi bbeix, aniuessor mel arbbor ama leil zzirbae zaxr gger mi-nr-bbe, doxgoxleixr arbbor ama halae aniuessor mel leil zzirbae zaxr gger mibbe. ¹⁵ Ngo nia leil beijjiu niazir a ngo ddei cirza-hanga lei nia leil gger yuex, hherdder ngo ca ddei jiujiu lei nia leil gger yuex. Holbbaexl ngo zzael ho bei ho nia leil perniar, nia zzael ho bei ho ngo leil per-nr-niar a ngo? ¹⁶ Nia arsae xiar doxl arsae nga a mel, nga zzae ngo nia leil maxrfaxr nr goxr. Nael nia cirmelmel a zzae halae ngo nixmox neixl a nia dax azo lerler li niazir eine zzir dae.

¹⁷ Ngo nia dax zi mal lei ca hal mel, ngo yaa arddol ddei leil sser dae a nia dax azo li goxr a bbeixleir? ¹⁸ Ngo Tixrdo leil quex a nia leil i lei lol, yoxl kebal nimar ar ddei leil yar dax cirgo a lei lol. Holbbaexl Tixrdo nia dax azo lerler li goxr a ngo? Ngua nrmel ca mu wor mu a Arbosobo ddei Xiu ddei ngua nixmox zzar hher ji dae, miar bei a ciryoxr a bei.

¹⁹ Holbbaexl nia zzir dae a ngo ddar eil mel bbeix a mel armael leil ddar te gger a ngo? Nael ngua mel Zidu leil koxl dae a Arbosobo meixsaer qier leil bbeix dae arddeir a. Ngo perniar dae ca mel, ngua cirza-hanga eil mel bei a mel nia leil hhel du lei lol niazzir a nga arddeir a. ²⁰ Ngo nia dax ssi car, nia ngo dax nixmox lo-nr-dda lei a gexr, ngo lei nia dax nixmox lo-nr-dda. Ngo, nia zzidax-zzie, zzi leil nixnox, sirzzi, hormo cir nei bbe mal, si leil bbeix vuxryixr, kerbiar, olvaer nei yarzi luaxl eine nga leilei a gexr. ²¹ Ngo zeixleixr halboxl lei car, Arbosobo ngo leil nia giedae seixlda lol arddeirnga a ngo gexr. Ca cirmelmel a halae capor ssormaer buxlguaer-laxlsixr bei, kerjiar, nrba nrba bei, halleix sael a zuixl eil mel bei doxr dae, huixrsoxr nr yuex. Eine nga a mel, ngo ca eil mel leil weix a nixmox no zildu var.

13

Barloxr Gelixrdo Jiaxlhuixl Gga Ca Mel Leil Quex

¹ Ngo mel so boxl ddei nia leil i lei niazzir dae a. Hherdder Arbosobo Ddei Sul ber leil bbeix dae mel sael a nga, bbeix: “Ha arseir ca ar ddei leil goxl arddeirnga a mel, ca nrso ler bbeix ggje noni ho a saelnei yar leil zuixl dixl gger ddo,”ⁿ eine bbeix a.^{o 2-4} Zuixl bei su ca mel nei kebal ca hal

ⁿ**13:1** Semixljil Sul 19:15 leil vaexr dae.

^o**13:1** Yaa arsae lerler bei dae mel Barloxr nr boxl mia a; kebal ca nrso ler lei mia a; yel Barloxr yaa leil zuixl dixl gger cexr.

mel, ngo xilmeir halboxl dder nia leil zuixl bei nr ddo bbeix gger zaxr goxr ho a. Eilcar ngo nia dax cirgo a nr hher dae a yoxl zeixleixr nia leil ar boxl bbeix gger. Nia mel Zidu yarzi ngo leil ngol dae a ddar biar biar a bbe saexl niazzir. Yel ngo zeixleixr halboxl lei car a arsaebeilei nia leil faxr. Halleix Zidu quexrlixl nr sser a sixrzixljiaxl leil si a; nael Arbosobo mel ddoddomo bei a yar leil gol du xixl lei lol a. Zidu nia leil faxr car a cirza-hanga lei yarzi ddo, yar azo bei ci nr xie ciryoxr lei nr zza. Ngua bei ci nr xie ar mel zza bbeixarnar, ngua Arbosobo ddoddomo bei dae hal mel leil koxl dae nei Yisu leil koxl dae a, nia leil faxr.

⁵ Nia nixixl goxr a yarzi Yisu leil ddarzzizzi bbe i nia, armael leil arleixr sixr i nia. Yisu Zidu nia dax cirgo a hher dax dae mel nia saexl zzarmar? Nia nr saexl arddeirnga a mel, nia dder yarzi Yisu leil ddarzzi su nr nga.

⁶ Ngo nia leil saexl lol niazzir, ngua yarzi Yisu miardal dae ca bei.

Arbosobo ngua leil nixloxdda. ⁷ Ngua Arbosobo leil qiuxr a, nia leil nr seir mel cirdoxr lei nr bei ssi lol. Eine bei a mel, ca mel leil ngua yarzi Yisu miardal dae ca a saexl lol nr nga, nia leil seirseir mel bei lol arddeir a.

Hherdder bbeix i dae a Arbosobo ngua leil nixlox-nr-dda sael a nga zzorbbeixlei nr zzi. ⁸ Niul mel ddarzi mel leil dir hal mel bei nr ddo,

ddarzi mel dax bei mae dae lalddo. ⁹ Nia bei hoxr a mel, ngua ngua ddei

quexrlixl sser a, nia leil bota nr ssa, yel kebal ca mel ngua leil nia dax gexr i mal gger bbeixarnar, nia zabbar seirseir a Arbosobo dax bei mae

dae a mel, ngua yarzi ggese. Ngua Arbosobo leil qiuxr a mel hherdder

nia leil seirceix-seirmaer ca hal mel loxr lol. ¹⁰ Yel ngo nia dax halmaex

nr hher dae car a dder ddar eil mel nia leil vaexr gger. Eine nga a mel

ngo lei car a Seirpor ngo leil quexrlixl gger mel dax zox dae a, nia leil

larhorhormo faxr nr ssa. Seirpor ngo leil quexrlixl eil mel gger a mel, ca

leil ke lol nr nga, ca leil hhel du lei lol arddeir a.

Barloxr Zzasoso Dae Biex

¹¹ Ngo ddei arzzi-nimar arzzi-nimo mel, ngo nia dax ddar biarlabox mel biar jjia du a. Nia ggesese a nga nia. Nia ho bei ho seir dax a seirceix-seirmaer nga nia, nia zzicarzzi leil quex nia, nia zzizzi-bbebbe a bei nia, zzi dax toltor a bei nia. Ca leil perniar nei ca leil nixmox zzaso lol su Arbosobo ddei leil nia dax cirgo a hher dae lol nia.

¹² Nia zzicarzzi leil zzasoso dae biex nia. ¹³ Ngo dax eilmaex hher dae Arbosobo ddei cassor-worssor maelmaerjjia lei nia leil zzasoso dae biex dae.

¹⁴ Seirpor Yisu Zidu nia leil seirseir meixl gger lol nia, Arbosobo nia leil perniar lol nia, Arbosobo ddei Xiu ddei nia maelmaerjjia dax hher dax dae lol nia.